



গণপ্রজাতন্ত্রী বাংলাদেশ সরকার

তথ্য অধিদফতর



PRESS INFORMATION DEPARTMENT, GOVERNMENT OF THE PEOPLE'S REPUBLIC OF BANGLADESH

তথ্যবিবরণী

নম্বর-২৫৬

বাঘা হবে কৃষকদের জন্য একটি মডেল উপজেলা

রাজশাহী; ০৬ জ্যৈষ্ঠ (২০ মে):

খুব শিগগিরই রাজশাহীর বাঘা কৃষকদের জন্য বাংলাদেশের মধ্যে একটি মডেল উপজেলা হবে বলে মন্তব্য করেছেন পররাষ্ট্র প্রতিমন্ত্রী মোঃ শাহরিয়ার আলম, এমপি।

আজ শনিবার (২০ মে) দুপুরে রাজশাহীর বাঘা উপজেলা পরিষদের শহিদ মিনার বটমূল চত্বরে আধুনিক প্রযুক্তি সম্প্রসারণের মাধ্যমে রাজশাহী বিভাগের কৃষি উন্নয়ন প্রকল্পের আওতায় তিন দিনব্যাপী কৃষি প্রযুক্তি মেলা-২০২৩ এর উদ্বোধনী অনুষ্ঠানে প্রধান অতিথির বক্তৃতায় তিনি এ মন্তব্য করেন।

প্রতিমন্ত্রী বলেন, বাঘার কৃষকরা আধুনিক প্রযুক্তি ব্যবহার করে যে ভাবে কৃষির বিপ্লব ঘটাবে, তা সত্যিই অসাধারণ, প্রশংসনীয়। গত ৩ বছর ধরে বাঘার আম বিদেশে রপ্তানি হচ্ছে। এবার গত কয়েক বছরের তুলনায় সব থেকে বেশি আম রপ্তানির টার্গেট নেওয়া হয়েছে জানিয়ে তিনি বলেন, বর্তমানে নগরায়ণ সব থেকে বেশি আম উৎপাদন হলেও আমের ভ্যারাইটির দিক থেকে বাঘা সবার চেয়ে এগিয়ে।

কৃষি মেলার গুরুত্বপূর্ণ দিক তুলে ধরে তিনি বলেন, কৃষি মেলা একটি ব্যতিক্রমী আয়োজন। এখানে আজ ১০০টি আমের বিচিত্র প্রদর্শনী হয়েছে— এটা দেখে আমি মুগ্ধ হয়েছি। কৃষিই হলো ভবিষ্যৎ, কৃষিই হলো সবচেয়ে বেশি লাভজনক একটি পেশা। দেশের কৃষির যে আউটপুট এটা দিগুণ করা সম্ভব; সেজন্য সরকারি সহযোগিতা ও আধুনিক কৃষিপ্রযুক্তির সঙ্গে সঙ্গে কৃষকের ঐকান্তিক প্রচেষ্টা জরুরি।

প্রধানমন্ত্রীর ভূয়সী প্রশংসা করে প্রতিমন্ত্রী বলেন, গত ৩ বছর ধরে পৃথিবীতে সেই সব দেশ মোটামুটি ভালো আছে, যারা কৃষিতে স্বয়ংসম্পূর্ণ। বাংলাদেশ সেসব দেশের মধ্যে একটি— আর এটা সম্ভব হয়েছে প্রধানমন্ত্রী শেখ হাসিনার দূরদর্শী নেতৃত্বের কারণে।

বেকারদের কৃষিতে এগিয়ে আসার আহ্বান জানিয়ে শাহরিয়ার আলম বলেন, কৃষিপ্রযুক্তি ব্যবহার করে এখন অনেকে লাভবান হওয়ায় কৃষিতে মানুষ আগ্রহী হচ্ছে। শুধু বসে বসে সময় নষ্ট না করে বাড়ির আশপাশের জায়গাগুলো সঠিকভাবে কৃষিকাজে ব্যবহার করে কীভাবে আয় করা যায় সেই লক্ষ্যে কাজ করার জন্য এসময় তিনি বেকারদের পরামর্শ দেন।

উপজেলা কৃষি অফিসার শফিউল্লাহ সুলতানের সভাপতিত্বে বক্তৃতা করেন উপজেলা আওয়ামী লীগের সাধারণ সম্পাদক মোঃ আশরাফুল ইসলাম বাবুল। স্বাগত বক্তব্য রাখেন অতিরিক্ত কৃষি কর্মকর্তা মোঃ কামরুল ইসলাম। অনুষ্ঠানে বিভিন্ন সরকারি-বেসরকারি দপ্তরের কর্মকর্তা-কর্মচারী, বিভিন্ন ইউনিয়ন পরিষদের চেয়ারম্যান, রাজনৈতিক ব্যক্তিবর্গ, কৃষক, প্রিন্ট ও ইলেকট্রনিক মিডিয়ার সাংবাদিকবৃন্দ উপস্থিত ছিলেন।

পরে পররাষ্ট্র প্রতিমন্ত্রী কৃষিতে বিশেষ অবদান রাখায় ৩০ জনকে শুভেচ্ছা স্মারক প্রদান করেন। ম্যাংগো ব্র্যান্ডিং কম্পিটিশন-২০২২ এর বিজয়ীদের হাতে পুরস্কার তুলে দেন।

.....
তৌহিদ/সিকান্দার/রুহুল/২০২৩/১৯.১০ঘ.